

qui tempore Iubilaei fuerit confessus, posse deinceps a quolibet Confessario votorum commutationem recipere, quamvis praefatam dispensationem tunc non postulaverit. Haec sententia a S. Ligorio dicitur probabilis. — Ibid. n. 536.

QUAER. 21. *Utrum facultas absolvendi a censuris includat facultatem absolvendi ab irregularitatibus?*

Resp. Neg. Ita communis sententia contra nonnullos, qui censent irregularitates ex delicto comprehendi sub nomine censurarum. Extant tamen plura exempla huiusmodi concessionis.

Duo autem praestat hic adnotare. 1<sup>o</sup> In Iubilaeo anni sancti seu Iubilaeo maiori, suspenduntur toto anno omnes aliae Indulgentiae tam plenariae quam particulares concessae pro vivis, non autem quae sunt concessae pro defunctis. Imo ex concessione Benedicti XIV. omnes Indulgentiae, etiam quae alias non erant defunctis applicabiles, iis hoc anno applicari possunt. — Vide Bullam eiusdem Pontificis iam pluries citatam.

Excipiuntur a suspensione Indulgentiarum pro vivis 1<sup>o</sup> Indulgentiae pro moribundis; 2<sup>o</sup> Indulgentiae pro oratione *Angelus*; 3<sup>o</sup> Indulgentiae pro visitatione Sacratissimi Sacramenti solemniter expositi; 4<sup>o</sup> Indulgentiae pro iis, qui comitantur SS. Sacramentum infirmis delatum; 5<sup>o</sup> omnes Indulgentiae, quae ab alio, quam a Papa, conceduntur. Haec deducuntur ex Constitutionibus Benedicti XIV. et Leonis XII.

2<sup>o</sup> Nullus ordo necessario requiritur in operis ponendis, modo ultimum opus in statu gratiae fiat. Si quis autem labatur in peccatum mortale post confessionem, non tenetur iterare visitationes Ecclesiarum, ieiunia, nec eleemosynam; tenetur tamen iterum confiteri. Sic Benedictus XIV. in Bulla modo citata.

## DECISIONES RECENTIORES CURIAE ROMANAE

### CIRCA INDULGENTIAS

#### POSTULATUM

Circa confessionem ad lucrandas Indulgentias requisitam

890. — Dubium 1<sup>um</sup> *Per Decretum S. Congregationis Indulgentiarum, datum die 12. Iunii 1822. conceditur, confessionem sacramentalem peractam infra hebdomadam ante festivitatem suffragari posse ad Indulgentiam lucrandam.*

QUAER. 1<sup>o</sup> *An verba, infra hebdomadam, significent octo dies tantum quae festivitatem immediate praecedunt: an vero hebdomadam illam totam et integram quae ante festum decurrit, ita ut ex. gr. confessio facta die Dominica suffragetur ad lucrandam Indulgentiam die sabbati hebdomadae sequentis, in quam diem festum incideret, tametsi tunc 13. dies inter confessionem et festivitatem intercessissent?*

QUAER. 2<sup>o</sup> *An confessio octavo die ante festivitatem peracta, vi huius Indulti suffragetur tantum ad unam Indulgentiam lucrandam; an vero per hanc confessionem aliae etiam lucrifieri possint Indulgentiae, quae infra praedictum tempus occurrunt, et ad quas lucrandas sacramentalis confessio caeteroquin requireretur?*

Dubium 2<sup>um</sup> *QUAER. An, cum in Bulla vel Brevis, quo conceditur Indulgentia, confessio tanquam conditio sine qua non praescribitur, necesse sit ut sacramentalis absolutio poenitentibus detur ad Indulgentiam lucrandam?*

S. Congregatio Indulgentiis sacrisque Reliquiis praeposita, die 15. Dec. 1841. respondendum esse censuit: Quoad Dubium primum, Ad 1<sup>um</sup>: *Affirmative quoad 1<sup>am</sup> partem. Negative quoad 2<sup>am</sup>.*  
Ad 2<sup>um</sup>: *Negative quoad 1<sup>am</sup> partem. Affirmative quoad 2<sup>am</sup>.*  
Quoad Dubium secundum, *Resp. negative. In quorum fidem... etc.*

#### POSTULATUM

De tabellis S. Viae Crucis exercitio inservientibus.

891. — 1<sup>o</sup> *Episcopus S. Flori (in Gallia) petit, utrum Indulgentiae, quae lucrifunt in contemplatione stationum Viae Crucis, cessent si Cruces vel tabulae tollantur pro murorum dealbatione, pro iisdem pi-*

ctura exornandis, aliave de causa quamvis deinde et Cruces et tabulae suis locis restituantur?

2<sup>o</sup> Quid si non omnes, sed nonnullae tantum supradictis de causis amoveantur? Quid si omnes Cruces cum tabulis per mensem circiter amoveantur, ut saepissime contingit pro murorum dealbatione?

3<sup>o</sup> Quid si in prima erectione Cruces et tabulae ita inter se adhaereant, ut nullus extet symmetricus ordo? Poteruntne intra eiusdem Ecclesiae ambitum contrectari de loco ad locum, ut aequae distent, quin Indulgentiae amittantur, et quibus in casibus nova erectio canonica requiratur?

Ex Secret. S. Congregationis Indulgentiarum, die 21. Martii 1836. quoad proposita dubia respondetur:

Ad 1<sup>um</sup>: Non amittunt Indulgentias.

Ad 2<sup>um</sup>: Gaudent Indulgentiis, non obstantibus, etc.

Ad 3<sup>um</sup>: Affirmative: et non cessant Indulgentiae, nisi pereunte materia.

#### De requisitis ad Indulgentias pro exercitio Viae Crucis lucrandas.

892. — QUAER. Utrum ad lucrandas Indulgentias pro visitatione 14. stationum Viae Crucis concessas, requiratur recitatio sex Pater Ave et Gloria, praeter praedictarum stationum visitationem?

RESPONSUM. Ad consequendas Indulgentias pro visitatione 14. stationum Viae Crucis concessas, nihil aliud requiritur, quam divini Redemptoris Iesu Christi Passionem meditando, ex una ad aliam stationem se conferre, in quantum multitudo personarum praeclaudatas stationes visitantium, vel capacitas loci in quo eadem sunt exactae permittant. Ita res est, ut ex Bulla Inter plurima Bened. XIII. 3. Martii 1726. confirmata per aliam Bullam Exponi nobis Clem. XII. diei 16. Ianuarii 1731. ad Decret. S. C. Indulg. die 3. Aprilis 1731. ac etiam Brevi Benedicti XIV. quod incipit, Cum tanta, die 30. Augusti 1741. Hinc est, quod Adoramus te, Christe; Pater noster; Ave Maria, etc.; Miserere nostri, Domine, sit tantum laudabilis consuetudo a piis Christi fidelibus in exercitium visitationis stationum Viae Crucis introducta. In quorum fide... Die 22. Septembris 1829.

#### RESPONSUM

S. Congreg. Indulg. circa varias Indulgentias.

893. — QUAER. 1<sup>o</sup> Utrum Sacerdos satisfaciat obligationi celebrandi Missam pro defuncto, servando ritum feriae vel cuiusque Sancti, etiamsi non sit semiduplex vel duplex?

QUAER. 2<sup>o</sup> Utrum qui privilegium habet personale pro quatuor Missis in hebdomadis singulis, debeat cum paramentis nigro colore celebrare, diebus non impeditis, ut possit Indulgentiam plenariam pro animabus defunctorum lucrari?

QUAER. 3<sup>o</sup> Utrum qui celebrat in altari privilegiato pro singulis diebus debeat semper uti paramentis nigris, diebus non impeditis, ut privilegii Indulgentiam consequatur?

QUAER. 4<sup>o</sup> Utrum, ad lucrandam Indulgentiam plenariam orationi: O bone et piissime Iesu, concessam, necesse sit aliam orationem addere pro intentione summi Pontificis?

QUAER. 5<sup>o</sup> Utrum ad Indulgentias applicabiles Crucibus, Rosariis, etc., alius ritus sit necessarius praeterquam signum Crucis a Sacerdote, qui hanc facultatem accepit, factum?

QUAER. 6<sup>o</sup> Utrum Indulgentia concessa cadat solum in Christo ex aere, ligno vel alia quaque materia facto, ita ut possit ex una Cruce in aliam transferri absque periculo amittendi Indulgentiam ipsi collatam?

S. Congregatio Indulgentiis sacrisque Reliquiis praeposita ad superiora Dubia sic respondendum esse censuit (Die 11. April. 1840.).

Ad 1<sup>um</sup>: Affirmative.

Ad 2<sup>um</sup>: Affirmative.

Ad 3<sup>um</sup>: Ut in secundo.

Ad 4<sup>um</sup>: Negative. Postea tamen Pius IX. Decreto 31. Iulii 1858. dato, declaravit, aliquas preces recitandas esse ad Ecclesiae intentionem, ad lucrandam Indulgentiam orationi, O bone et piissime Iesu, concessam.

Ad 5<sup>um</sup>: Negative. Attamen ex Declaratione S. Congreg. die 11. Aprilis 1864., requiritur formula et aspersio aquae benedictae, ad coronas S. Dominici, et B. M. V. septem Dolorum benedicendas.

Ad 6<sup>um</sup>: Affirmative.

#### INDULTUM SS. GREGORII PP. XVI.

894. — Quo socii Confraternitatis S. Mariae de Carmelo in posterum eximuntur ab inscriptione nominis sui in tabellis praedictae Confraternitatis, ut illius Indulgentias lucrari valeant, postulante R. P. Generali Carmelitarum discalceatorum, ex audientia Sanctissimi die 30. Aprilis 1832. Sanctissimus Dominus N. Gregorius PP. XVI. peculiaribus circumstantiis ac praevia sanatione quoad praeteritum, benigne annuit in omnibus iuxta preces, servatis tamen in reliquis de more servandis ad formam praecedentium concessionum, contrariis

quibuscumque non obstantibus. Praesenti in perpetuum valituro, absque ulla Brevis expeditione (\*).

Quaesita circa Indulgentias.

895. — 1<sup>o</sup> An, ad lucranda Indulgentiam vel fructus orationis Sacrosanctae, etc..., necessario flexis genibus haec oratio sit dicenda, vel an saltem in casu legitimi impedimenti, ambulando, sedendo, recitari valeat?

2<sup>o</sup> An parvi habitus seu scapularia sint necessario immediate super corpus deferenda, ita ut physice tangant, vel an super vestes retineri possint?

3<sup>o</sup> An Indulgentiae adnexae ad recitationem parvi Officii B. V. Mariae, a sanctae memoriae Pio V., valeant pro solo Officio Romano, vel an pro variis Officiis B. M. Virginis, ab auctoritate episcopali compositis, ad instar Officii Romani?

4<sup>o</sup> Qui recitat hymnum Veni Creator, etc..., non iuxta correctionem metri, sed iuxta pristinum metrum, lucraturne Indulgentias? Doxologiae (hymni Veni Creator) variatio intra tempus Paschale et extra, estne de essentia operis ad lucranda Indulgentias?

In Galliis hymnus Veni Creator doxologiam habet auctoritate episcopali propositam; qui praedictum hymnum recitant cum ista doxologia: valentne suas illius facere Indulgentias?

5<sup>o</sup> Antiphona Regina coeli, quae dici solet tempore Paschali loco precum Angelus Domini, recitatur in aliquibus locis cum versiculis et responsis diversis ab illis quae dantur in Breviario Romano: an recitatio praedictae antiphonae cum ista commutatione ius det aequale ad Indulgentias?

Quibus Dubiis ab Eminentissimis Patribus sacris Indulgentiis praepositis in generali Congregatione apud Vaticanum, die quinta Martii 1855. habita, mature perpensis votoque Consultorum audito, die 16. Iulii 1855. fuerunt in voto, rescribendum esse:

- |              |   |                               |
|--------------|---|-------------------------------|
| Ad primum:   | { | Affirmative ad primam partem. |
|              | { | Negative ad secundam.         |
| Ad secundum: | { | Negative ad primam partem.    |
|              | { | Affirmative ad secundam.      |
| Ad tertium:  | { | Affirmative ad primam partem. |
|              | { | Negative ad secundam.         |
| Ad quartum:  | { | Negative in omnibus.          |
| Ad quintum:  | { | Negative.                     |

(\*) Hoc indultum revocavit SS. D. N. Leo XIII. die 27. Apr. 1887. Cf. decretum apud Beringer les Indulgences etc. vol. 2 p. 203.

Relative ad coronas in speciem anuli confectas.

896. — Ad quaesitum: Utrum anuli aurei vel argentei, decem nodulis circumdati, quibus utuntur quaedam piae personae ad Rosarium B. Virginis recitandum, benedici possint cum appositis Indulgentiis?

Respondit Eminentissimus Cardinalis Castracane, Poenitentiarius Maior, de mandato Sanctitatis Suae Gregorii XVI.: Negative.

De interventu Ordinarii quoad Indulgentias a Sede Apostolica concessas.

897. — QUAER. 1<sup>o</sup> Utrum Indulgentiae locales, id est, quae cuidam loco, v. gr. Ecclesiae, altari affiguntur, nullae sint et nullius valoris, ita ut frustra conarentur fideles illas lucrari, quamdiu eas non permisit publicari illius loci Episcopus?

Resp. Negative, quoad nullitatem Indulgentiarum. Expectanda tamen erit publicatio Ordinarii, postquam illas recognoverit, ut sciant fideles an sint Indulgentiae plenariae vel partiales, et quae sint conditiones assignatae ad illas acquirendas.

QUAER. 2<sup>o</sup> Utrum Indulgentiae, privilegia et facultates personales, id est, quae alicui personae privatae conceduntur, v. gr. Indulgentia concessa alicui pro articulo mortis, Indultum personale altaris privilegiati, facultas benedicendi coronas B. M. V. cum applicatione Indulgentiarum, sint pariter nullae et nullius valoris, quamdiu Episcopus illas non recognovit et executioni mandari non permisit?

Resp. Negative,

898. — QUAER. 3<sup>o</sup> Utrum Indulgentiae, quas Summi Pontifices omnibus totius Orbis fidelibus concessere in Bullis seu Rescriptis iam publicatis et ab auctoribus probatissimis citatis, sint nullae et nullius valoris, ita ut illas fideles lucrari non valeant, nisi antea ab Ordinariis locorum in suis respective dioecesibus promulgatae fuerint?

Resp. Negative.

QUAER. 4<sup>o</sup> Utrum, supposita illius promulgationis necessitate, Episcopus quicumque possit illas Indulgentias, de quibus in tertio Dubio agitur, promulgare in sua dioecesi, modo eas reperiat relatas apud auctores fide dignas, v. gr. Ferraris, vel in la Raccolta?

Resp. Affirmative ex supra expositis, et in casu de quo in dicto Dubio S. Congreg. Indulgent. 31. Augusti 1844. (pro omnibus his quaesitis).

899. — QUAER. 5<sup>o</sup> Utrum qui obtinet diversas facultates ab Apostolica Sede, scilicet altaris privilegiati personalis, erigendi stationes Viae Crucis, benedicendi Cruces, Numismata, debeat exhibere dictas

*facultates Ordinario, etiamsi nulla mentio facta sit in concessionum Rescriptis?*

Resp. Affirmative quoad Viae Crucis erectionem, negative relative ad alias facultates, nisi aliter dispositum in obtentis concessionibus. — *S. Congreg. Indulg.* die 6. Febr. 1844.

**De Indulgentia in articulo mortis.**

900. — **QUAER.** 1<sup>o</sup> *Utrum sufficiat recitatio confessionis, id est Confiteor, in Sacramento Poenitentiae habita, pro recitatione illius praescripta, quando impertienda est benedictio cum indulgentia in articulo mortis?*

Resp. Negative, iuxta praxim et Rubricas, nisi necessitas urgeat.

**QUAER.** 2<sup>o</sup> *Utrum necesse sit tribus vicibus recitare Confiteor, quando administratur sacrum Viaticum, Extrema Unctio, ac Indulgentia in mortis articulo impertitur?*

Resp. Affirmative, iuxta praxim et Rubricas.

**QUAER.** 3<sup>o</sup> *Utrum infirmus pluries lucrari possit Indulgentiam plenariam in mortis articulo, a pluribus Sacerdotibus facultatem habentibus impertiendi?*

Resp. Negative, in eodem mortis articulo.

**QUAER.** 4<sup>o</sup> *Utrum Sacerdos valide conferat Indulgentiam plenariam in articulo mortis, omissa formula a Summo Pontifice praescripta ob libri deficientiam?*

Resp. Negative, quia formula non est tantum directiva, sed praeceptiva. Die 5. Februarii 1841.

**De altari privilegiato.**

901. — **QUAER.** 1<sup>o</sup> *Quaenam sit altaris privilegiati efficacia?*

Resp. Per Indulgentiam altari privilegiato adnexam, si spectetur mens concedentis et usus potestatis clavium, intelligendam esse Indulgentiam plenariam, quae animam statim liberet ab omnibus Purgatorii poenis; si vero spectetur applicationis effectus, intelligendam esse Indulgentiam, cuius mensura divinae misericordiae beneplacito et acceptationi respondet. *S. Congr.* die 28. Iulii 1840.

**QUAER.** 2<sup>o</sup> *Utrum ille, qui celebrat in altari privilegiato pro singulis diebus, debeat semper uti paramentis nigris, diebus non impeditis, ut Indulgentiam privilegii consequatur?*

Resp. Affirmative (*S. Congr. Indulg.* 11. April. 1840.). *Sed lucratur Indulgentiam altaris privilegiati, qui, pro defuncto celebrans, Missam tamen legit de festo currenti, quando dies est impedita.* — *S. Congr. Indulg.* 11. Mart. 1851.

Privilegium inhaeret altari, non vero lapidi, qui alteri pro necessitate vel opportunitate suffici poterit (*S. Congr.* 20. Mart. 1839.): ita ut diruto altari, privilegium non pereat, sed reaedificato altari sub eodem titulo, reviviscat. Imo non perit privilegium, si altare sub eodem titulo erigatur, sed in diverso Ecclesiae loco (*S. Congreg. Indulg.* 30. Augusti 1847.).

**Decretum S. C. Indulg. de altari privilegiato.**

902. — *Andegaven.* In generalibus Comitibus *S. Indulgentiarum Congregationis* habitis die 29. Februarii 1864. Episcopus Andegavensis sequentia Dubia enodanda proposuit:

I. Utrum privilegium altaris privilegiati, sive reale, sive personale, applicari possit pluribus defunctorum animabus in cuiuscumque diei Missa?

II. Utrum facultas apostolica concessa Ordinario Andegavensi ut in omnibus Ecclesiis parochialibus dioecesis Andegavensis ter in qualibet hebdomada celebrentur cum cantu Missae de Requiem dum Officia occurrunt ritus duplicis, quibusdam tantum exceptis, possit libere in praxim deduci, an vero Missae de Requiem differendae sint in alias dies hebdomadae, in quibus sit ritus semiduplex?

III. Utrum Sacerdos gaudens privilegio personali altaris possit in hebdomada, cum recurrit festum duplex, celebrare et lucrari Indulgentias, an debeat expectare festa semiduplex ad easdem lucrandas?

*Sacra Congreg.* respondendum censuit (die 20. Aug. 1864.):

Ad 1<sup>um</sup>: *Negative.*

Ad 2<sup>um</sup>: *Affirmative, quatenus non occurrant festa semiduplex in hebdomada.*

Ad 3<sup>um</sup>: *Ut in secundo.*

**De Indulgentia Portiunculae.**

903. — **QUAERITUR:** An visitantes Ecclesias Ordinis S. Francisci die secunda Augusti lucrentur Indulgentiam plenariam toties quoties in eas ingrediuntur, et parumper ibi orant, et an requiratur ut Communio fiat in eadem Ecclesia?

*S. Congreg.* sub die 22. Februarii 1847. respondit: *Affirmative ad primam partem, negative ad secundam partem.*